

PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL PERTAMA,
PARLIMEN KEEMPAT BELAS

PERTANYAAN : LISAN

DARIPADA : PUAN KASTHURIRAANI A/P PATTO
[BATU KAWAN]

TARIKH : 10 JULAI 2019

SOALAN NO. 97

Minta **PERDANA MENTERI** menyatakan sama ada Kerajaan telah mengkaji kaitan di antara perbuatan mengekori atau menghendap (stalking) secara berulang, dengan perbuatan jenayah serius, terutama terhadap mangsa wanita yang telah dibunuh dan apakah usaha untuk menjenayahkan rogol dalam perkahwinan (marital rape) selain daripada peruntukan dalam Kanun Keseksaan

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JPM

1. Pada 30 Mei 2019, saya telah mengadakan mesyuarat bagi membincangkan dasar berhubung keperluan bagi menjadikan kesalahan menghendap sebagai suatu jenayah. Mesyuarat tersebut telah dihadiri oleh wakil-wakil daripada Pejabat Peguam Negara, agensi-agensi dan kementerian yang berkaitan serta pertubuhan bukan kerajaan. Berdasarkan mesyuarat tersebut, satu jawatankuasa khas akan ditubuhkan bagi mengkaji cadangan dan mekanisme untuk menjadikan kesalahan menghendap sebagai suatu jenayah di negara ini.

2. Kajian ini adalah terhad kepada keperluan bagi menjadikan kesalahan menghendap sebagai suatu jenayah dan tidak meliputi kaitan menghendap dengan jenayah lain. Pada masa kini, jika berlaku pembunuhan, pertuduhan akan dibuat di bawah seksyen 302 Kanun Keseksaan [Akta 574]. Persoalan sama ada hendak dikaitkan atau tidak dengan kesalahan jenayah menghendap dalam sesuatu pertuduhan membunuh adalah bergantung kepada fakta kes.

3. Berkaitan dengan isu rogol dalam perkahwinan, pada masa kini, terdapat peruntukan undang-undang sedia ada iaitu seksyen 375A Kanun Keseksaan yang digunakan untuk menangani kesalahan suami menyebabkan kecederaan untuk mengadakan persetubuhan dengan isteri. Menurut seksyen 375A Kanun Keseksaan, mana-mana suami yang menyebabkan kecederaan atau ketakutan kematian atau kecederaan kepada isterinya atau mana-mana orang lain untuk mengadakan persetubuhan dengan isterinya boleh dipertuduh dan dikenakan hukuman penjara yang boleh sampai lima tahun.

Sekian, terima kasih.